

Friday, February 21, 2025

Time - 2:30pm

OBITUARY

Mizoram Legislative Assembly budget session neih laiah, vawiin khan India Prime Minister hlui, nikum a thi ta Dr Manmohan Singh-a sunna hun hman a ni a, ngawi rengin minute khat chhung an ding.

House Leader Pu Lalduhoma chuan, Dr Manmohan Singh chu politics-ah a zuanluh hma pawhin India ram tan a tha thawh hlawk tak a ni tih a sawi a, ram tan hna pawimawh leh lian tak tak lo chelh tawh a ni a ti a, chung zingah chuan Governor of the Reserve Bank of India pawh a tel, a ti.

Chief Minister Lalduhoma chuan sawi zawmin, Manmohan Singh chu India economist leh parliamentary ropui tak a ni a ti a. Union Finance Minister a nih lai kum 1991-1996 kha India ram sum leh pai dinhmuna hun khirh tak a tawh lai niin a sawi a, chu hun khirh leh hun thim siam tha tura Liberalisation Budget hmanga huaisen taka hma a lak ngamna chu a chuanawmin India ram bung thar a chuan kai lehna a nih bakah, khawvelin Economist ropui tia an hriatna a ni ta niin a sawi.

Pu Lalduhoma chan, Manmohan Singh-a'n India leh ram danga thawhhona tur a duante chu thil pawimawh tak niin, tun thlenga India ram a chhawr tangkai an ni tih sawiin National Rural Health Mission te, National Rural Employment Guarantee Act bakah Right to Information Act te chu a hun laiin dan puitling a hlankai an ni a ti a, ram leh hnam tana a hna thawhte chu a ngaihlu in a chhuang hle tih a sawi bawk.

Leader of Oppostion Lalchhandama Ralte pawhin, India ram Economy tluchhia siamtha tura India in a chhuan leh neih that a ni a ti a, India fa chhuanawm, mipui tam si economy chak lo taka awm pawh a khawhawi thak a, hmasawnna thlentu a ni, a ti.

Siaha bialtu MLA Dr K. Beichhua leh Lawngtlai West bialtu MLA Pu C. Ngunlianchnunga te pawhin a uina thu sawiin, Pu C. Ngunlianchnunga chuan thusawi thiam a nih vanga hriat hlawn a ni lo a, hnathawk thiam mi a nihna chu khawvelin a hriat dan a ni, tiin a sawi bawk.

**WATER BILL**

Public Health Engineering Department Minister, Prof. Lalnilawma chuan, tundinhmunah Mizoramah tui bill tihsan tumna a awm rih lo a ti.

He thu hi vawiina Assembly thutkhawma zawhna leh chhanna hunah sawiin, Minister chuan a kaihhruai Department chuan vawi khatmah tui bill tihsan chungchang an la sawi lo tih a sawi a, hetihlai hian VC inthlan dawna tui a hnianghnar theih nana theihtawp an chhuah hnuah tui a haw that avangin metre a sang a, department lamin mipuite hnenah tui an dawn tam avangin tui bill a sang dawn tih an hriattirna chu media thenkhatin sorkarin tui bill tihsan a tum tiin an vawrh darh niin a sawi a, Mizoramah tui bill tihsan tumna a awm rih lo tih a sawi a ni.

**GENERAL ASSEMBLY**

Akashvani Mizoram Staff Welfare Association chuan vawiin chawhnu hian AIR Transmitter Complex, Chawnpuiah General Assembly an hmang.

He hunah hian Mizoram hmun hrang hranga Akashvani hna thawkte an kalkhawm a, thupui atan 'Radio for Social Change' tih hman a ni.

Chanchinthar puan lai pawh hian General Assembly hi hman mek a ni a, General Secretary Pu Lawmliana Tochhawng chuan report a pe dawn a, chairman Pu DR Lalropuia chuan inlawmna thu a sawi dawn bawk a ni.



ONE HELPLINE

District Hub for Empowerment of Women (WCD) Saitual District buatsaihin tukin khan One Nation, One Helpline pualin kawng zawh a ni.

CI Kawn, Saitual Chhim Venga hun hmanah hian District Mission Coordinator Pi Mary Malsawmkimi chuan, DCM chuan mi tin ten mobile phone hmangin balance nei lo pawhin ni khata darkar 24 chhunga engtik hunah pawh tanpuina leh mamawh ang te awmhmun atangin an dil thei tih a sawi a, office dawr nana hun leh tha khawh ral ngai loin awlsam leh rang zawkin mi ten tanpuina an dawn theih phah dawn a ni, a ti. Pi Mary Malsawmkimi chuan call dawn te hi a call tu sawi chhuah phal loh “confidential” vek a nih avangin, thenawm khawvengah te hmeichhia emaw naupang emaw chung a hleilenna thleng a awm a nih chuan, report hreh lo turin kalkhawmte chu a chah a ni.

(Helpline hrang hrang zingah 181 chu hmeichhe tanpuina tur “women helpline” a ni a, 1098 chu naupang tanpuina “child helpline” niin, 112 chu huap zau zawk “emergency response” hrang hrang damlohna te, rikrum thil te leh khuarel chhiatna hrang hrang thleng thulha tanpui dilna tur a ni ang.)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Zanin dar 6 leh a chanve-ah Chanchinthar hi puan leh a ni ang.



SOCIAL WELFARE MINISTER

Social Welfare & Tribal Affairs Minister Pi Lalrinpuii chuan vawiin khan National Tribal Livelihoods Submit 2025' a tel pui.

Dr Ambedkar International Centre, New Delhi-a hun hman hi Bharat Rural Livelihoods Foundation leh Axis Bank Foundation huaihawt niin, Minister Pi Lalrinpuii chuan, Mizoramah mipuite eizawna kawnga hmalak mekna state flagship programme Hand holding policy ah thawhpui a chak thu a sawi a. Kut hnathawka eizawng tam tak chu eizawna ngelnghet zawk an neih theihna tur kawng - marketing leh processing ah te thawhhona kawng awm thei se a duh thu a sawi bawk.

Minister Pi Lalrinpuii chuan Mizoram chu state kilkhawr bera awm ni mah se ramah theihna tam tak a awm thu sawiin, ruahmanna tha a awm chuan kut hnathawka eizawngtu Mizote chu hnam taima leh rinawm tak an nih thu sawiin, khawkar kawngah pawh Nghahloh dawr (shop without shop keeper) hun rei tawh tak atanga chin tawh a nih thu a sawi bawk.

He Tribal Livelihood Summit-ah hian Funding agency lian te, PSU lam bakah International development sector-a thawkte te leh Central Ministry leh state hrang hrang aiawhte an tel.

Kum 2013 khan Central sawrkarin BRLF hi Autonomous society ni a, Tribal ten eizawna ngelnghet an neih nana thawk tura a din niin tunah hian Tribal hnam awmna state 10-ah State sawrkar nen tangdunin hna an thawk mek a. Central fund bakah CSR fund hmangin Foundation lian tak tak nen an thawkho a, Mizoramah pawh lo lut ve turin sawrkarin ruahmanna a siam mek a ni.

